

La Quotidiana 15-1-2016, p. 22

17.25 CUNTRASTS SIN SRF 1

Dr. à Porta – In ritgun da bun cor



Tge han immobiglias amez la citad da Turitg da far cun ils cudeschs da scola da Ftan? E pertge profitescha il fugitiv Ali Azad da Cuira dad ina fundaziun turitgaisa? La raschun da quests lioms insolits è dr. Stephan à Porta, in à Porta cun ragischs a Ftan, mort avant 70 onns. L'emprima mesadad dal 20avel tschientaner erigia Stephan à Porta a Turitg ina chasa suenter l'otra. La fin finala ha ses imperi passa 170 edifizis. Ina facultad enorma – però ina facultad che à Porta na surlascha betg a ses ertavel. Ord dad ina raschun sorprendenta, surdat el sia ovra a la Fundaziun dr. Stephan à Porta. Quella ha oz 1323 abitaziuns, ina valita da 389 milliuns e fa in gudogn annual dad 1.4 milliuns. In quart da quest gudogn vegn onn per onn dabun al chantun Grischun, 5% van a Ftan. Il film raquinta l'istorgia dals raps che vegnan si da Turitg, l'istorgia da la pli gronda fundaziun privata d'util public da Turitg e l'istorgia da dr. Stephan à Porta, impressari, speculant e benefactor.